

Exposiziun «Stampa 3D» a Strada

La Società Stamparia Strada exista daspö 30 ons

D'incuort ha salvà la Società Stamparia Strada sia radunanza generala. La festa da giubileum da trent'ons vain fatta quista stà culla musica dals Fränzlis da Tschlin e'ls oters musicants dal lavuratori.

Daspö trent'ons exista la Società Stamparia Strada. Ella s'ingascha pel mantegniment da la stamparia veglia a Strada respectivamaing dal museum. Quel as rechatta d'immez il cumün da Strada illa Chasa S-charplaz. In quista stamparia sun gnüts stampats tanter ils ons 1689 fin 1881 üna blerüra da cudeschs rumantschs. A la radunanza generala ordinaria chi ha gnü lö in sonda passada e chi'd es gnüda manada dal president Georg Häfner ha tut part bundant üna quarantina da persunas.

Theodor Gut, plü bod il CEO da las Zürichsee Medien ed uossa commember da la fundaziun Stamparia Strada, ha preschantà in quell'ocasiun la nouv'exposiziun «Stampa 3D» i'l museum a Strada. Quist'exposiziun preschainta la tecnologia da stampar in trais dimensiuns. «Pel mumaint es quai

la plü grond'exposiziun in Svizra chi's dedichescha a quista tematica», ha dit Georg Häfner, ch'els sajan superbis da pudair muossar i'l pitschen museum a Strada ün'exposiziun uschè actuala.

Dal büschmaint fin pro la Formula 1

«Quai es stat pussibel grazcha a la collavuraziun cul Politecnicum ETH ed üna scoul'ota specialisada a Turich sco eir cun differents exponents da quella branscha.» Uschè pon preschantar ils respunsabels dal Museum Stamparia Strada exponats tuot particulars ed exclusivs in lur museum: Els muossan il prüm vesti chi'd es gnü copchà in trais dimensiuns. Ils architects pon far models cun quista tecnologia moderna.

«Fich interessada vi da quella tecnologia es eir la Formula 1. Nus pudain muossar tanter oter ün tanc fich liger chi'd es gnü copchà in 3D», s'allegra Georg Häfner, «cun noss duos stampaders in 3D cha nus vain cumprà pudaina stampar durant las uras d'avertüra dal museum cul prüm pitschens ogets in plastic e cun tschel figüras da tschiculatta.»

Festa da giubileum quista stà

Las tractandas statuarias ha evas la radunanza generala da maniera speditiva: Il president ha pudü preschantar

als commembers ün surplü d'entradas da bundant 16000 francs. Il guadogn da la Società Stamparia Strada consista da las entradas dals commembers. Pella gestiun dal museum es respunsabla la fundaziun Stamparia Strada. La radunanza generala ha acceptà il quint annual 2017 e decis unanimamaing da surdar 15000 francs a la fundaziun per finanziair l'exposiziun actuala «Stampa 3D» e la gestiun dal museum. Sainza cuntravusch han ils preschaints approvà eir il rapport annual.

Davo la radunanza ha sunà la musica da Tschlin suot la bachetta da Duri Janett chi'd es eir commember da la fundaziun Stamparia Strada. Als 27 da lügl festagescha la società in chasa da scoula a Strada seis giubileum: «Quai es güst l'ultim di dal lavuratori dals Fränzlis da Tschlin. Els ed eir ils partecipants dal lavuratori imbelliran nossa festa», ha dit Georg Häfner, «davomezdi es lura avert il museum da la stamparia per tuot quels chi nun han fin quella jada amo vis l'exposiziun da la stampa in trais dimensiuns.» (anr/fa)

L'exposiziun «Stampa 3D» düra fin la fin d'october. Il museum es avert mincha sonda da las 15.00 a las 17.00, i'ls mais lügl ed avuost eir in gövgia a las medemmas uras. Per gruppas drive il museum tenor curvegna. Infourmaziuns: www.stamparia.ch